

ميدان العتبة ثلاث مسرحيات علاء قريش



ميدان العتبة
علاء قريش
١



الناشر :- دار الفراعنة للطباعة والنشر
والتوزيع

اسم الكتاب: ميدان العتبة

اسم المؤلف: علاء قريش

رقم الايداع: ٥٨٢١ / ٢٠١٨

الترقيم الدولي: 0-0031-91-977-978

رئيس مجلس الإدارة :- إكرام عيد

المدير التنفيذي :- حبيبة وليد محمود

مراجعة لغوية وتحرير أدبي : د. عبد الرحمن

محمد حجازي

حقوق الطباعة محفوظة للمؤلف

المراسلات:

دار الفراعنة للطباعة والنشر والتوزيع

٣٣ المدينة المنورة فيصل الجيزة

موبايل: ٠١٠٠٦١٤١٦٤٥ ت: ٣٩٧٦٩١٧٦

ي. ب.

علاء قريش

ميدان العتبة مسرحية من فصل واحد

شخصيات المسرحية

- كهل ضرير ومعه طفل يجره لايتعدى السبع سنوات
- شقيقين من الريف ياسين وعويس
- كوثر وعادل خطيبين
- رامى رجل أعمال وسكرتيره مدبولى
- بائع متجول وبائعة مناديل متجولة
- ماسح أحذية يجلس على الرصيف
- صبي متشرد يقوم بالشحاة
- شيخ كبير صعيدى على المعاش نيفين وزوجها طارق وإبنتها
- ثلاثة شباب
- فتاة تحمل رضيع فتاة تلبس ملابس خليعة
- شخصيات أخرى

الديكور

- موقف أتوبيسات العتبة
- رصيف يقف عليه بعض شخصيات المسرحية
- ورصيف مقابل يقف عليه البعض الآخر من
- شخصيات المسرحية يتوسطهما موقف
- الإتوبيسات ولكنه خالى لم يأتى الإتوبيس

الرصيف ١

الكهل الضرير : " يتحسس إبنه " تعالى هنا يابنى لحسن
الإتوبيس ييجى بسرعة
الطفل : ماتخفش يابابا
الكهل الضرير : ماخفش ازاي وانت ابن عمرى ، انت
ماتعرفش انا عملت ايه لحد ماانت جيت
الطفل : عملت ايه يابابا
الكهل الضرير : " يضحك "
الطفل : بتضحك ليه يابابا
الكهل الضرير : " وهو يضحك " أصلك قليل الأدب
يابنى
نيفين : " تنظر الى الطفل وتتعجب لزوجها " عيال آخر
زمن الواد بيقول لأبوه عملت ايه علشان تجبنى
طارق : " بغيط " انتى واخده بالك من كل حاجة ، ياوليه
سيبى الناس فى حالهم
نيفين : ياراجل مايصحش تكلمنى كده قدام الناس
الأبن : أهوه إبتدينا
الإبنه : إحنا زهقنا من كتر الخناقات
نيفين : عجبك كده كلام العيال
طارق : البركة فى تربيتك الحلوه
نيفين : شوف الراجل دلوقتى بقت تربيتى ليه هم مش
عيالك

ميدان العتبة

علاء قریش

طارق : الله اعلم
 نيفين : أخص عليك راجل ناقص بتتهمنى فى شرفى
 طارق : ياست انا جبت سيرة شرفك
 نيفين : مش بتقول الله أعلم
 طارق : ودى فيها ايه ربنا اعلم بكل شئ ولاحتكفرى
 كمان
 الأبى : بابا ماما لاحظوا اتنا فى الشارع
 نيفين : " تستجدى عطف ابنها " طب مانت شايف يابنى
 ابوك بيقول ايه
 الأبى : معلش
 نيفين : " تبكى "
 الإبنه : " تربت على كتف أمها وفى تهكم " الكلام ده فى
 البيت
 نيفين : إخص عليكى مانتى كده جفيه عليا .. انا بمثل يعنى
 علشان تقولى الكلام ده فى البيت
 الرجل الصعيدى : " لرامى بك " قولى يافندى هو
 الكارنيه بتاع المعاشات اللى عملاه الست الوزيره
 مايمشيش فى المترو
 رامى بك : لا يا حاج على ما أعتقد
 الرجل الصعيدى : تعرف يافندى لو كان راجل اللى عمل
 الكارنيه ده كان يمشى فى كل حته لكن دى ياولداه ست
 ماحدش يمشى كلامها
 رامى بك : " يضحك "

ميدان العتبة
 علاء قریش
 ٦

شاب ١ : " ساخراً " بس ممكن تدخل بيه السيما يا حج
الرجل الصعيدى : مش محتاجة كل بيت فيه سينامتين
رامى بك : وانت زعلان يا حج
الرجل الصعيدى : طبعاً وليه نسهر لحد الصبح والناس
ماترو حش اشغالها
شاب ٢ : بلاش تتكلم فى السياسة
(الشباب الثلاثة يضحكون)
رامى بك : وهو الراجل قال حاجة
الرجل الصعيدى : سيبه يافندى اصلى دول جيل النكسة
البنطلون بيلبسوه مقطوع من حطة لامؤخذه كده ماتعرف
الواد من البت
رامى بك : " يضحك "
شاب ٣ : " بتهكم " على اساس انكم الجيل اللى جبتلنا
الانتصارات ، ياراجل دا احنا معرفناش النكسة والنكبة
غير على ايديكم وهى الوكسة اللى احنا فيها دى غير منكم
انتم
الرجل الصعيدى : الله يسمحك يا ولدى ونعم التربية
رامى بك : عيب ياكابتن دا قد والدك
الرجل الصعيدى : يافندى سيبه هو دا جيل بيحترم حد ؟
شاب ١ : والنبي صلونا على النبي انت وهو
مدبولى : ولد عيب انت مش عارف بتكلم مين
شاب ١ : بكلم مين يعنى

ميدان العتبة

علاء قریش

مدبولى : دا رامى بيه عضو مجلس النواب ومرشح
للوزاره واكبر مستثمر

(الشباب الثلاثة يضحكون فى تهكم)

شاب ٢ : ياسلام كل ده ومستنى اتوبيس

شاب ٣ : لازم دى جوله ميدانيه

(الشباب الثلاثة يضحكون)

مدبولى : " لرامى بك " انا قلت لساعدتك بلاش نيجى هنا

رامى بك : محصلش حاجة بس هو الاتوبيس اتأخر ليه

مدبولى : دا العادى

رامى بك : إظاهر الفوضى بقيت هى العادى فى البلد

نيفين : معقوله يكون ده صح عضو مجلس شعب ومرشح

للوزاره لا طبعا مش معقوله وزير فى مصر بيركب اى

مع الناس " لزوجها " ساكت ليه مابتدثش عليها ليه

طارق : " بإستياء " أرد اقول ايه

نيفين : معقوله دا عضو مجلس شعب

طارق : مش الراجل اللى معاه هو اللى بيقول كده هو انا

اللى قلت

نيفين : هو صحيح لابس كويس وباين عليه النعمة وانه

ابن ناس بس طبعا مش معقوله ، لا دا باين عليه نصاب

طارق : ياستى احنا مالنا نصاب مش نصاب خيلنا فى

حالنا

نيفين : اهو انت كده دايمه كسفى

الابنه : اهم حيتخنقوا تان

ميدان العتبة

علاء قریش

الرصف ٢

عويس : " يمسك بيد أخيه ياسين الذى يبدو عليه التوهان
" ازيك ياخوى وحشتتى
ياسين : كليوباتره لم تكن سوى امرأة لعوب أما انطونيو
فهو خائن خان روما من اجل امرأه
عويس : انا اخوك عويس انت مش عارفنى ياياسين
ياسين : عبد الناصر كان زعيم ولكن الثورة المجيدة لم
تكن السبب فى خروج الانجليز بل عمر الانجليز انتهى
استعمارياً بعد الحرب العالمية الثانية
عويس : لاحول ولاقوة الا بالله دا الواد تايه عالآخر
كوثر : بقالك قد ايه خطبنى
عادل : خمس سنين
كوثر : يعنى حنفضل طول عمرنا مخطوبين
عادل : ياكوثر مانتى عارفه الظروف
كوثر : ظروف ظروف انا يا عادل كرهت كلمة الظروف
عادل : يعنى اسرق
كوثر : دى مش مشكلتى
عادل : انتى اتغيرتى
كوثر : لا يابابا انا طول عمرى زى مانا بس انت اللى
مش شايف
عادل : الله يسمحك
كوثر : ويسمحك

ميدان العتبة

علاء قریش

عادل : طب انا عملت ايه
كوثر : ايوه انت بقى عملت ايه ولا بتعمل ايه قولى
عادل : وانا فى ايدى ايه وماعملت هوش
كوثر : وانا مالى انا ليا عريس جاهز ، لعلمك مافيش بنت
دلوقتى تقبل الوضع ده
عادل : يعنى ايه
كوثر : يعنى قدامك لنهاية السنة دى لو مجهزتش كل
واحد يروح فى حالة
عادل : وتنتهى قصة حبنا
كوثر : ياعم حب ايه بقى بطل تعيش فى الاوهام بعد
مانتجوز نحب مانحبش مش مهم المهم نتجوز
ياسين : بهيه عمرها ماحبت ياسين ولا كليوباتره انتحرت
علشان انطونيو ولا ليلى عشقت قيس
الفتاة الخليفة : " تقف بجوار ماسح الاحذية التى يتطلع
على ساقها " أوف الدنيا النهاردة حر قوى
ماسح الاحذية : اه عالرجل الحلوى لما تلبس جزمه
متلمعه
(الفتاة تنظر الى ماسح الاحذية بتأفف وتتصرف بعيدا
عنه)

الرصيف ١

شاب ١ : ولا شايف البت اللي عالرصيف التانى

شاب ٢ : أوف دى موزه

شاب ٣ : يالا بينا

(ينصرفون الى الرصيف ٢ ويقفوا بجوار الفتاة)

مدبولى : " لرامى " انا مش عارف ليه ساعدتك خلتنا

نيجى هنا

رامى بك : لازم نشوف ونسمع دا دورنا

مدبولى : دورنا فى ايه ونشوف ونسمع ايه ساعدتك انا

مش فاهم حاجة

رامى بك : انا عضو مجلس شعب يعنى ممثل الشعب فى

المجلس لازم اعرف هم عايزين ايه عايشين ازاي بيعملوا

ايه بيفكروا فى ايه

مدبولى : " منفرداً " يابن الكدابه وفلوس الشعب اللي فى

بطناك

رامى بك : انت سرحت فى ايه

مدبولى : لا ابدأ باسمع حضرتك

رامى بك : الشعب مطحون يامدبولى تخيل الزحمة

الشديده دى على اتوبيس وياريت منتظم وأدمى شايف

ماسح الاحذية اللي قاعد هناك ده (يشير الى ماسح

الأحذية على الرصيف ٢)

ميدان العتبة

علاء قریش

أهو بيقتد من اول النهار لآخر النهار يمسح جزم الخلق
علشان عشرة عشرين جنيه فرحان بيهم وغيره زى بتاع
الحلاوه ده (يشير الى بائع الحلوى المتجول) بيرجع بأقل
من كده ومع ذلك بيرجع لعياله مبسوط فى حين فى ناس
بتكسب كل ساعة الاف الجنيهات ومش سعيده
مدبولى : " منفرداً " زى ساعدتك
رامى بك : بتقول حاجة يامدبولى
مدبولى : لا ابدأ ياباشا
رامى بك : حتى الشباب دول صدقتى لو دخلهم كويس
وحياتهم كويسه عمرهم ماحييقوا كده
مدبولى : " منفرداً فى تهكم " هو احنا داخليين انتخابات
ولااياه
البائع : شيكولاته من بلاد بره عسليه من بلاد بره
مصاصة من بلاد بره
الطفل : بابا هتلى شيكولاته من بلاد بره
الكهل الضرير : " يضحك " حشتريلك من محل عمك
عبده اللى من بلاد جوه
الطفل : لا انا عاوز من الراجل ده
الكهل الضرير : يابنى " يتلفت وبصوت منخفض " هو
جنبنا
الطفل : لا اناديه
الكهل الضرير : لا لا " بصوت منخفض " انا قصدى
حاجته مش نضيفه

ميدان العتبة

علاء قریش

بائع الحلوى : " يقترب من الطفل ويشير الى صندوق
الحلوى بخبت " عسليه يابانى شيكولاته امريكاني وفي
مصاصة فرنساوى مين يقول هات ومعانا اللبان يعطر
الفم وينصف السنان ويمنع ريحة الدخان
الطفل : " وهو ينظر الى صندوق الحلوى فيشد ابيه " بابا
انا عاوز لبان
الكهل الضرير : حجبك اللي انت عاوزه من محل عمك
عبده

(بائع الحلوى ينصرف الى الرجل الصعيدى)
رامى بك : " ساخراً " حتى شيكولاتة العتبه من امريكا
الصعيدى : " يضحك " دى ماما امريكا
بائع الحلوى : شيكولاتة يا بلدينا مين يقول هات
الرجل الصعيدى : شيكولاتة ودي هعمل بيها ايه
بائع الحلوي : تاكلها يا بلدينا
الرجل الصعيدى : الا قولى يا ولدى هوه انت منين
بائع الحلوي : من المنوفية
الرجل الصعيدى : يعني مش بلديك وتبيع شيكولاته
امريكاني توكل على الله يا ولدى "ساخرا" مابحبهاش
"بائع الحلوي ينصرف الي نيفين وزوجها طارق"

الرصف ٢

" الشباب الثلاثة يلتفون حول الفتاه الخليه "

شاب ١ : مساء الخير

الفتاه : " تنظر ولا تجيب "

شاب ٢ : ايه مش سمعه

الفتاه : " تنظر ولا تجيب "

شاب ٣ : طب روى السلام و بلاش تقل

الفتاه : " تنظر ولا تجيب "

شاب ١ : اسمي سمير

شاب ٢ : وانا صلاح

شاب ٣ : وانا شريف

الفتاه : " تبسم "

شاب ٢ : ايوه كده

شاب ١ : اسمك ايه

الفتاه : نرمين

شاب ٣ : اسم الي مسمي

شاب ٢ : " ينظر اليه من قدميها الي جسدها كله " حلو حلو

قوى

الفتاه : " تتصنع الخجل " ايه هو اللي حلو

شاب ٢ : كل حاجة كل حاجة حلو

الفتاه : انا مش فهمه

شاب ١ : مش مهم تفهمي

الفتاه : " بدلال " يعني اية

ميدان العتبة

علاء قريش

شاب ٣ : لا مافيش حاجة " يخرج علبة سجائر مستورده
" تدخني

الفتاة : " بدلال " لا مايصحش .. الناس

شاب ٢ : ناس مين احنا يهمناش الناس

شاب ١ : خدى منه خدى ولا يهملك دى ملفوفه

الفتاه : يعني ايه ملفوفه

شاب ٣ : الله .. انت هتصيعي علينا يعني مش عارفة

يعني ايه ملفوفه

نيرمين : لا مش عارفه

شاب ١ : لمؤخذه انت منيين

نيرمين : من بولاق ابو العلا

شاب ٣ : قشطه يعنى مش من المهندسين

(يضحكون)

ياسين : العالم بيتكلم عن الالهramات والآثار اما احنا

لانهتم لانها ملكنا

عويس : " حزين " ياخواتى من يوم ماحصل اللى حصل

وهو كده

ياسين : الفراعنه هم سبب تأخرنا فنحن لانقول غير اننا

اصحاب السبع الاف سنة حضارة ولانزال نقول حضارة

. نحن أحفاد الفراعنة . لعنة الفراعنة اصابتهم . يبدو ان

لعنة اجدادنا لم تصب غيرنا

ميدان العتبة

علاء قریش

عويس : الله يسمحك يابهية باقه الواد يحبك وتضحكى
عليه ويلاقيكى فى حضن عدوه بتخونيه . استغفر الله
العظيم

بائعة المناديل : " تقترب من الفتاة التى تحمل طفل "
مناديل ساعدنى ياشابة واشترى مناديل
الفتاة : " خائفة تحتضن الطفل " لا مش عاوزه
بائعة المناديل : مالك ياختى خايفه ليه
الفتاة : " مذعورة تحتضن الطفل " مش خايفه ابعدى عنى
مش عاوزه حاجة

بائعة المناديل : " متعجبة تنصرف الى كوثر و عادل "
مناديل ياعروسه ساعدونى ربنا يتمم فرحك ويهدى سرکم
كوثر : " فى تهكم " اشترى منديل ساعد الست ولا معكش
تمن المنديل

عادل : عيب ياكوثر مايصحش كده
كوثر : وهو ايه اللى يصح يصح بدل ماتروحنى فى تاكس
جايينى هنا علشان نتشعبط فى اتوبيس وبدل ماتحافظ عليه
عايزنى اتزنق وسط الرجاله ويعالم ايه تانى وكل ده ليه
عشان معاه كارنيه يركب بيه الاتوبيس ببلاش ويوفر
تذكره

عادل : " منفعلا " خلاص بقى كده كثير انا استحملت
بمافيه الكفايه وكان بأيدى انا ومعملتهوش
كوثر : انت بتنفعل عليه ليه
عادل : ياكوثر

كوثر : خلاص
بائعة المناديل : صلوا عالنبى ياجماعه هدى نفسك
ياعروسه البيه مايقصدش يز علك
كوثر : " منفعة " وانتى مالك انتى دا اللى ناقص كمان
واحده شحاته تدخل فى حياتى " لعادل " عجبك كده
عادل : " لبائعة المناديل " عجبك كده اهى زعلت
بائعة المناديل : " تشوح بيدها " ياخويا ماهى على طول
ز علانه وانا مالى تشتروا مناديل
عادل : لا
كوثر : امشى من هنا
بائعة المناديل : مناديل تمسح بيها دموع العروسه
عادل : امشى
بائعة المناديل : " وهى تنصرف الى ياسين وعويس "
خلاص ماتشخطش ماقدرش على الحمار قدر على
البردعه

ميدان العتبة

علاء قريش

الرصف ١

بائع الحلوى : " نيفين " تشتري ياست هانم شيكولاته
مستورده

نيفين : " لزوجها " ماتشترلنا شيكولاته

بائع الحلوى : شيكولاته مستورده مين يقول هات

طارق : لا شكراً يابنى

نيفين : شكراً ليه اشترلنا

طارق : " منفعلا " عامله زى العيال الصغيرين دا عيالك

ماقلوش هاتلنا يابابا

نيفين : يعنى لو عيالك قالوك هات حتجيبيلهم طبعاً وانا

زى عيالك

بائع الحلوى : " بخبث " مش حقول الواحده بخمسه جنيه

ولا حقول التلاته بخمسه جنيه لا الخمسه بخمسه جنيه من

يقول هات

طارق : اتوكل على الله مش عايزين

نيفين : لا استنا انا عاوزه شيكولاته

طارق : ياستى دى مغشوشه ويمكن تضرك

بائع الحلوى : لا يابيه لو سمحت ماتشككش فى ذمتى

الرجل الصعيدى : ياولدى هو فيه حد عنده ذمه اليومين

دول

رامى بك : عندك حق

طارق : غريبه حضرتك اللى بتقل كده

رامى بك : مش فاهم انت تقصد ايه

ميدان العتبة

علاء قریش

طارق : يعنى زى ماسمعت من سيادته " يشير الى
مدبولى " انك عضو مجلس شعب ومرشح للوزارة
ومليونير

رامى بك : برضه مش فاهم

طارق : يعنى الذمم مالهاش معنى فى قاموس حياتكم

رامى بك : " غاضب " انت بتخرف بتقول ايه

نيفين : لا لا يابيه هو مايقصدش " لأبنائها " شايفين

ابوكم حيودينا فى داهيه ازاي " لرامى " حقك عليه يابيه
هو مايقصدش يزعلك

الرجل الصعيدى : يابيه ماتزعلش احنا فى زمن الحراميه
فيه بقوا بشوات

مدبولى : احتم نفسك ياراجل انت

الكهل الضرير : ياجماعة صلوا عالنبى الدنيا لسه بخير

الرجل الصعيدى : لامؤخذه علشان انت مش شايف

الرجل الضرير : الله يسمحك

الطفل : " للرجل الصعيدى فى حده " اهو انت اللى اعمى

الرجل الصعيدى : " فى ندم " فعلا ياولدى انا اللى اعمى

البصيرة " للكهل الضرير وهو يربت على ظهره "

ماتأخذنيش ياخوى انا ماقدش اجرحك لكن الدنيا بقت
وحشه

رامى بك : " فى حالة خطابه " احنا مانكرش ان فى

سلبيات لكن زى مابتشوفوا السلبيات لازم تبصوا على

الايجابيات وانتم شايفين تصريحات المسؤولين بالصحف

ميدان العتبة

علاء قریش

قد أيه هي بتدعوا للتفائل لمستقبل مشرق جميل فأحنا لازم
نستحمل علشان ولادنا من بعدنا لان دي تراكمات
واخطاء الناس اللي سبقونا واحنا بنصلح
الرجل الصعيدى : اللي شايفينوا احنا غير اللي انتم
شايفينوا احنا شايفين الظلم فى صورة المرض والجوع
والجهل احنا زهقنا من الضرب على الفقا جربت ياسعادة
البيه لما يكون ابنك مريض ومش معاك تمن الكشف ولو
لقيت تمن الكشف مش حتلاقى تمن العلاج ولو احتاج
عملية حتوديه المستشفى الحكومى وتستنا دورك لحد
مايفضى سرير ويولداه يفضل ينازع قدامك وانت مش
عارف تعمله ايه ويموت ياولداه بين ايدك ويسيبك انت
الى تنازع جربت ياسعادة البيه انك تكون عاجز تشوف
ابنك محتاج حاجة وانت مش عارف تجيبهاله جربت
ياولدى انك تدخل ولدك مدرسة حكومية ويبقى الفصل فيه
اكثر من خمسين عيل ومايلقيش كرسى يقعد عليه ويقعد
على الارض فى عز الشتا والبرد ياكل فى جنته وعقله
كمان واذا ربنا فتح عليه وتخرج حتفاجئ بيه حمار ماهو
ياولدى كل اللي بيتعلمه مايخليهوش غير حمار وتدوره
على شغل ماتلقيش عشان حمار غيره كان عنده واسطة
ويقعد جنبك عاطل زى خبيبتها
رامى بك : ماحدش بيتولد غنى .. الحياة كفاح
الرجل الصعيدى : " ساخراً " لا ياولدى دا كان زمان اما
دلوقتي فى زمن حكمكم الغنى بينزل من بطن امه غنى

ميدان العتبة

علاء قریش

ويعيش ويمون غنى اما الفقير بيتولد فقرى ويعيش فقرى
وكان يموت فقرى وحتى التربه يولدى مش بىلاقى
يشترىها ويبدفن مع اى حد .. بس انا اللى مستغربه
ياولدى انتكم بتشتروا ترب وتبنوها وتزوقوها وكأنكم زى
ماخدتكم الدنيا بالباطل عايزين تاخدوا الأخرة كمان بالباطل
وتبقى مصيبه لو دخلنا احنا الفقرا الجنة جزاءً لصبرنا
على اللى عملتوه فينا فى الدنيا ونلاقيكم معانا فى الجنة
طارق : " ساخرأ " ويمكن نلاقيهم هم اللى دخلوا الجنة
واحنا اللى دخلنا النار
نيفين : ازاي يعنى
طارق : يشتروها
نيفين : استغفر الله العظيم انت حتكفر ياراجل

الرصيف ٢

عويس : الله يسمحك يابهيبة باقه الواد يحبك وتضحكى
عليه وتقولى له بحبك ماليش غيرك وفى الاخر يشوفك مع
واحد تانى بتـ ... استغفر الله العظيم
ياسين : قيس لم يحب ليلى قيس اتخذ من ليلى ملهمة وليلى
إمرأة جاهلة امرها ابوها ان تتزوج فتزوجت من غير
قيس
عويس : والمصيبه دا عدوه
الصبى المتشرد : " لعويس " عم ممكن تدينى اجيب
سندوتش

ميدان العتبة

علاء قریش

عويس : روح ياله بعيد سيبنى فى المصيبة اللى انا فيها
بائعة المناديل : " تقترب من عويس " هو ده اخوك
ياخويا
عويس : ايوه ياست
بائعة المناديل : هو ماله كفانا الشر
عويس : ربنا يلطف بينا وبياه
بائعة المناديل : دا انا شفته كتير فى كذا حته وياحبة عيني
مدهول كده وبيهلوس زى مانت شايفه كده
عويس : اصل ياولداه كان بيحب بهية قوى بس هى خنته
ورمت نفسها فى احضان عدوه
كوثر : حب حب يعنى ايه حب كلمه بقت ماسخة ومبقاش
ليها طعم
عادل : طب ايه اللى فاضل
شاب ١ : الجنس
شاب ٢ : الفلوس
شاب ٣ : الشهرة
شاب ٢ : " للفتاة الخليفة " ولا ايه ياحلوه
الفتاة الخليفة : " فى خلاعة " ماينفعش التلاته
شاب ٢ : اوبا " للشباب " ايه رأيكم الحلوه عايزه التلاته
شاب ١ : وماله التلاته موجودين " ليشير الى نفسه
وزميليه " جنس وفلوس وشهرة يالا ياحلوه
(يخرجوا)

الرصيف ١

الرجل الصعيدى : " وهو يتحسس قفاه لرامى بك "
جربت يافندم تضرب على قفاك
رامى بك : " خائف يتحسس قفاه " لا ماحصلش
الرجل الصعيدى : ماتخافش يافندى انت حد يمد يده عليك
دا انت الحكومة والحكومة مابتضربش الشعب هو بس
الى يضرب واللى يضرب الشعب على قفاه هى الحكومة
فاهمنى يافندى .. ماتخافش
الكهل الضرير : انا سامع صوت الاتوبيس جاى
الطفل : اروح اشوفه يابابا
الكهل الضرير : " خائفاً يحاول الإمساك به " ماتروحش
فى حطة يابنى أقف جانبى
(الطفل يجرى ليظلم المسرح تماماً يسمع صوت
الأتوبيس يصطدم بالطفل وسط صراخ الناس - أيضاً
المسرح لنجد الطفل ملقى على الأرض مغطى بدمائه
ليحمله الرجل الصعيدى)
نيفين : " وهى تبكى وتصرخ وتمسك بطارق " الواد مات
الواد مات ياطارق
طارق : ايوه مات يانفين
(الابن والابنه فى حالة بكاء)
الكهل الضرير : " وهو فى حالة تسأل بجنون " هو فى
ايه ياولاد مين اللى مات هو الاتوبيس خبط حد ، فين الواد
محمود ابنى ياواد يامحمود تعالى جنبى ياواد متتعبنيش

ميدان العتبة

علاء قریش

(نيفين وابنائها فى حالة بكاء بينما طارق فى شئ من
التأثر)

رامى بك : لاحول ولا قوة الا بالله .. مسكين الراجل
الكهل الضرير : يامحمود يابنى .. ياولاد محدش شايف
محمود ابنى

مدبولى : الراجل حيتجن
الرجل الصعيدى : " وهو يحمل جثة الطفل ويبكى " هدى
نفسك ياخوى .. ولدك معايا
الكهل الضرير : " فى حالة اهتمام بجنون " فينه ياواد
يامحمود كنت فين ياولا .. هو مبيكلمنيش ليه .. انت ياولا
زعلان منى . انا ياولا خايف عليك " وهو يضحك " مانا
ياولا ياقليل الادب قللتك انت ماتعرفش انا عملت ايه
عشان اجيبك

الرجل الصعيدى : " وهو يبكى " ياولد الناس حرام عليك
قطعت قلبى البقية فى حياتك فى ولدك ياخوى وده نصيب
وقدر خبطه الاتوبيس

الرجل الصعيدى : مات .. انا كنت عارف انه حيموت ..
محمود ولدى يابلدينا كان لازم يموت " وهو يأخذه
ويحمله ويحتضنه " مت يامحمود مت يابنى .. طب ليه
ياولا تموت وتسيبنى هو انا زعلتك فى حاجة طب كنت
استنيت معايا شويه اشبع منك

(لتخر قدماه ويجلس على الارض وهو يحتضن ابنه
ويبكى)

ميدان العتبة

علاء قریش

الرجل الصعيدي : " وهو يمسك بالكهل الضرير باكياً "
ياللا ياخوى اروحك عشان تلحق تدفن ولدك دا اكرام
الميت دفنه
(يخرج الكهل الضرير حامل ابنه ومستند على الرجل
الصعيدي)
نيفين : " لزوجها وهى تبكى " ياله ياطارق نروح معاه
نعمل الواجب
طارق : " بتأفف " نروح فين احنا نعرفه
نيفين : وماله دا واجب والناس لبعضها
طارق : اظاهر انتى اجننتى ممكن تسكتى خالص
الابنه : خلاص ياماما ممكن نسكت
نيفين : وانا قلت حاجة غلط يابنتى دا الراجل حالته
تصعب على الكافر
الابن : بابا ليه حق وبعدين احنا إتأخرنا يالا ناخذ حاجة
من بره الموقف
(يخرج طارق ونيفين وابنائهما)
مدبولى : " لرامى " نروح ورا الراجل المسكين ده
ياسعادة البيه
رامى بك : هو الراجل ده تتبع الداييره
مدبولى : لا
رامى بك : خلاص كبر .. احنا ندعيه ان ربنا يصبره
مدبولى : طب ايه حنقعد ولا نمشى

ميدان العتبة

علاء قریش

رامى بك : اهو نستنا شويه " وهو يتألفت حوله " قولى
يامدبولى البت اللى كانت وقفه مع التلات شباب مش
شايفه ولا شايف العيال التلاته
مدبولى : " بخبث " ايه ياباشا عجبك
رامى بك : " وهو يضحك بخبث " يعنى روح دعبسلى
عليها
مدبولى : " ينصرف " امرك

الرصيف ٢

بائعة المناديل : " تقترب من الفتاة التى تحمل طفلاً "
مناديل ساعدينى ياشابه واشترى مناديل
الفتاة : " خائفة تحتضن الطفل " لا مش عاوزه
بائعة المناديل : مالك ياختى خايفه ليه
الفتاة : مش خايفه ابعدى عنى مش عاوزه حاجة
(بائعة المناديل فى تعجب تنصرف)
كوثر : " لعادل " الحب مش حياكلنا عيش .. الفلوس هى
اللى حتأكلنا وتشربنا وتسكنا وكمال الفلوس بتشتري حب
عادل : عمر الفلوس ماحتشترى الحب ، الحب ياهانم
مشاعر و الفلوس مش حتشتري المشاعر
كوثر : " وهى تعطيه الدبله " روح شوفلك واحده تأكلها
مشاعر وربنا يسمحك على السنيين اللى ضيعتها من
عمرى

ميدان العتبة

علاء قریش

(تخرج وهو ينظر اليها حزين ثم يخرج ورائها فى اتجاه
اخر)
ياسين : الإنسان الغنى ليس من يملك الأكثر بل هو من
يحتاج الاقل
بائعة المناديل : " لعويس " هو يقول ايه ياخوى
عويس : انا عارف ياست اهو من ساعة مالمقيته وهو
بيخرف
بائعة المناديل : ربنا يشفيه ياخويا .. طب ماتاخذ منديل
وانا ادعيله وانا دعوتى
عويس : " يضع يده فى جيبه ثم يخرجها " معلش اصل
مش معايا فلوس معكيش ياست خمسة جنيه اروح بيها
بلدنا انا واخويا
(بائعة المناديل تنتظر اليه بإحتقار وتنصرف من امامه)
(الفتاة تحمل طفلها فى ارتباك تنتظر الى رامى بك
بالرصيف الاخر لتتنصرف الى الرصيف الاخر)

الرصف ١

الفتاة : " تقترب من رامى بك فى حالة ارتباك " ازيك

ياسى رامى

رامى بك : مين ثريا

ثريا : انت لسه فاكرنى

رامى بك : اه طبعاً وانتى تتنسى

ثريا : والله كويس انك لسه فاكرنى

رامى بك : وانت عامله ايه

ثريا : الحمد لله

رامى بك : وانت روحتى فين بعد مامشيتى من عندى

اشتغلتنى عند حد تانى

ثريا : انت حتصتعبط ياباشا

رامى بك : " فى غضب " انتى بتقولى ايه يابنت

ثريا : يعنى انت مش عارف انا كنت فين عايز تعرف "

تشير الى الطفل التى تحتضنه " اسأل ابنك

رامى بك : ابنى انتى اتجننتى يابنت

ثريا : ايوه ابنك يارامى بيه ولا انت ناسى

رامى بك : وانا ياماما مضربتكيش على ايديكى

ثريا : ايوه انت مضربتنيش على ايدى بس انت استغليت

ظروفى وقهرتنى ولما قلتلك تصلح غلطك رمتنى فى

الشارع

رامى بك : وانت دلوقتى عايزه ايه

ميدان العتبة

علاء قریش

ثريا : " وهى تخرج سكينه من بين ملابسها " عايزه حق
ابنى اللى انت كنت السبب فى موته " لتطعنه بالسكين "
(ليسقط رامى بك ميتاً وسط دهشة الموجودين
ثريا : " تجلس ثريا على الارض وتضع ابنها على
الارض وتضحك بهستيريا " خذتلك تارك يابنى يا حبيبى

الرصف ٢

الفتاة الخليعة : " تدخل وملابسها ممزقة تصرخ "
اغتصبونى ولاد الكلب ضحكوا عليا واغتصبونى
(الكل ينظر اليها فى غريزة كأنهم ينظروا لفريسة ليظلم
المسرح تماما ويسمع اصوات صراخ الفتاة وأصوات
أخرى وعويس ينادى) ياسين فينك ياسين انت هربت
تانى

- النهاية -

الحلم هو الحقيقة

ميدان العتبة

علاء قریش

مسرحية قصيرة

ملحوظة

- عند شباك التذاكر مع كل تذكرة يوزع بامفرت بأسم مسرحيتين مختلفتين كل أسم مسرحية مختلف عن الأخرى فلتكن مسرحية أسمها الحلم ومسرحية أسمها الحقيقة أبطال كل عرض مختلفين عن الآخرين حتى يتهى المتفرج لمشاهدة عرضين مختلفين .
- شخصيات المسرحية غير محددين

الديكور

المسرح خلفيته تنقسم لقسمين خلفية على اليمين بيضاء وخلفية على الشمال سوداء بحيث لايتجاوز ابطال العرض على اليمين هذه الخلفية ولايتجاوز أبطال العرض الذى على الشمال هذه الخلفية القسمين خاليين دائماً من الديكور

يدخل مغنى ويقف فى منتصف المسرح بين الخلقيتين يغنى مقطع من رباعيات جاهين مع ان كل الخلق من أصل وطنين

ميدان العتبة

علاء قریش

وكلهم بينزلوا مغمضمين
بعد الدقايق والشهور والسنين
تلاقى ناس أشرار وناس
طيبين
عجبي

- يخرج المغنى مع رفع الستارة عن العرض
- المسرح مظلم تماماً شخصان يجلسان القرفصاء كل
منهما يسند ظهره على ظهر الآخر فى منتصف
المسرح بين القسمين تسلط عليهما إضاءة على شكل
كره ..
- الشخصين يتمددا بحركات راقصة حتى يقفا تماماً
ثم ينفصلا وكل منهما يدخل القسم التابع له وتنقسم
معهما الإضاءة - ثم يخرجوا - إضاءة المسرح كله
على القسمين .

القسم الأول .. ذوالخلفية البيضاء

" تدخل امرأة محمولة على تروللى
المستشفيات فى حالة وضع بطنها
منتفخه وحولها أربع وهم فى إهتمام

القسم الثانى .. ذوالخلفية السوداء

" تدخل إمراة فى حالة وضع بطنها
منتفخ ترتدى على الأرض المرأة
تتوجع من ألأم الوضع وحولها

ميدان العتبة

علاء قریش

شديد المرأة تتوجع من ألام الوضع

طبيب ١ : إطمنى

طبيب ٢ : مش حتحسى بحاجة

طبيب ٣ : الموضوع حيكون فى
غاية البساطة

طبيب ٤ : داحفيد المليادير المعروف
أبو الذهب بيه

إظلام للحظات يسمع خلالها
صوت طفل يضحك ..

ثم إضاءة .. المرأة على الترولى
بعد الوضع وبجوارها الطفل

(فلتكن دمية شكلها جميل
وتبدو عليها السعادة)

وبجوارها الأطباء سعداء
من على جبينهم

طبيب ١ : ألف مبروك

طبيب ٢ : السعداء زادوا واحد

" إظلام "

أربع سيدات "

إمرأة ١ : اتوجعى ياختى هى الخلفه
بالساهل

إمرأة ٢ : اطلقى ياختى هى الخلفه
بالساهل

إمرأة ٣ : اطلقى ياختى حاولى
اغصبى على نفسك

إمرأة ٤ : إنزل يابنى من غير غلب
هو ابوك ولا امك نافصين غلب

إظلام للحظات يسمع خلالها
صوت طفل يبكى ..

ثم إضاءة .. المرأة على الأرض
بعد الوضع وبجوارها الطفل

(فلتكن دمية شكلها قبيح
وتبدو عليها الحزن)

النسوة الأربع تعساء يمسحون
الدموع من أعينهم

إمرأة ١ : شدى حيلك ياختى

إمرأة ٢ : التعساء زادوا واحد

" إظلام "

ميدان العتبة

علاء قریش

القسم الأول .. ذو الخليفة البيضاء

" يدخل أحد الممثلين وبيده
التليفون المحمول يتحدث
من خلاله مع شخص "

ايوه .. ايوه تلاته اربعة مليون دولار

ايوه .. ايوه فيلا مارينا

ايوه .. ايوه العربية البى ام دبليو

ايوه .. ايوه فرح فى الهيلتون

ايوه .. ايوه مافيش مشاكل

ايوه .. ايوه انا ابن ابو الذهب

" إظلام "

القسم الثانى .. ذو الخلفية السوداء

" يدخل أحد الممثلين يحمل
جردل وحاجة ساقعة "

ايوه .. حاجة ساقعة

ايوه .. ايوه حاجة ساقعة

اروى عطشك ياعطشان

ايوه .. ايوه قلشونى من كلية
الشرطة عشان امى غسالة
واتخرجت من كلية الهندسة
واشتغلت بيع حاجة ساقعة ..
حاجة ساقعة

ايوه .. ايوه كسبنا عشرة جنيه

ايوه .. ايوه انا ابن الناس الغلابه

" إظلام "

القسم الأول .. ذو الخلفية البيضاء

• يجلس الممثل على

القسم الثانى .. ذو الخلفية السوداء

• يجلس الممثل على الأرض

ميدان العتبة

علاء قريش

- إحدى الطاولات التى عليها زجاجات من الخمر وكاسات وورق كوتشينه وتجلس بجواره فتاة وحوله يجلس بعض الأشخاص يلعبوا ويشربوا

الممثل : اللى يكسب البت دى من نصيبه

- يظلم المسرح إلا من بقعة ضوء
- فى هذا القسم فاصل موسيقى
- الممثل فى هذا الجانب يشاهد ما يحدث
- راقص دلالة على الصراع فى اللعب
- فى القسم الأول

الممثل : (صائحاً) انا اللى كسبت انا ابن ابو الذهب (يشد الفتاة من يدها) تعالى يا حلوه انت من نصيبى (صراخ الفتاة - المسرح يظلم تماماً) (يضاً هذا القسم تماماً ليدخل ضابط ومعه عسكريين - الفتاة ملقاه على الأرض ميتة ويجلس على الطاولة الممثل وهو يحتسى الخمر وفى حالة نشوة)

ميدان العتبة
علاء قريش
٣٤

الضابط : اسمك وسنك وعنوانك

الممثل : انا ابن ابو الذهب

الضابط : ابو الذهب اللي هو ابو الذهب

الممثل : ايوه هو

الضابط : طب وايه يعنى مواطن زى
بقية المواطنين .. انت متهم بإرتكاب
جريمة قتل وسرقة وإغتصاب وإتلاف
منشآت خاصة والعريضة والسكر
والبلطجة

(الممثل ينظر اليه ويبتسم فى تهكم)

الضابط : " فى غضب للعساكر "

اقبضوه عليه

(العساكر يمسكو بالممثل)

(يرن تليفون الضابط ليتحدث فيه)

الضابط : ايوه يافندم اقبضنا عليه ايوه
يافندم بيقول انه ابن ابو الذهب .. بس
يافندم فى واحد ميته واغتصبها قبل
مايقتلها .. يافندم . يافندم ... طب حاضر
حاضر يافندم

ميدان العتبة

علاء قریش

الضابط : " يضع تليفونه فى جيبه
وبأسى للعساكر " سيبوه
العسكرى ١ : " ينظر الى الضابط
متعجب " نسيب مين
الضابط : سيبوا سعادة البيه

العسكرى ٢ : " متعجب " بيه مين
الضابط : " فى غضب " قلنا سيبيه

العسكرى ١ : والقتل والاغتصاب
والسرقة والتعاطى مين عملهم
الضابط : " يشير الى القسم الثانى على
الممثل الذى يقف يشاهد ما يحدث بالقسم
الاول " هو ده اللى عمل كل الجرائم
دى اقبض عليه وايدها ضده فى
المحضر

العسكرى ٢ : قاتل

الممثل : " باكيا " انا مقتلتش

العسكرى ١ : شمام

الممثل : انا لاقى اكل علشان اشم

العسكرى ٢ : حرامى

ميدان العتبة

علاء قريش

الممثل : انا ماسرقتش

العسكري : مغتصب

الممثل : " باكياً " مابعرفش

الضابط : " بأسف " اقبض عليه

الممثل : " حزين " وانا مين

اللى حيكلم علشانى

- مع الإظلام صوت بكاء الممثل -

- مع الإظلام صوت ضحكات الممثل -

القسم الثانى .. ذو الخلفية السوداء

(إظلام تام بالمسرح الا من

بقعة ضوء يقف فيها الممثل حزين)

الممثل : مفيش حاجة عندى .. مفيش

" يقترب ناحية القسم الأول فى مواجهة

الأول ويتحاور معه "

القسم الأول .. ذو الخلفية البيضاء

(إظلام تام بالمسرح الا من بقعة ضوء

يقف فيها الممثل حزين)

الممثل : كل حاجة عندى موجودة .. كل

حاجة بقدر اجيبها

" يقترب ناحية القسم الثانى فى مواجهة

الممثل الذى بالقسم الثانى ويتحاور معه

"

ملحوظة : الإضاءة تسلط على الممثلين

ولكنها

ا

ميدان العتبة

علاء قریش

ة
ة

م
ن
ف
س
م
ة

ب
ي
ن

ا
ل
م
م
ث
ل
ي
ن

ميدان العتبة
علاء قريش
٣٨

القسم الأول .. ذو الخلفية البيضاء	القسم الثانى .. ذو الخلفية السوداء
الممثل : كان نفسى أتعب	الممثل : كان نفسى اتعب
الممثل : انا ارتحت كثير وكل حاجة كانت عندى .. مفيش حاجة طلبتها ماخدتهاش لكن عمرى ماحسيت بطعم اى حاجة	الممثل : " ساخراً " طول عمرى بتعب واجرى واشقى وعمرى ماخدت حاجة انا محتجلها
الممثل : ياريتنى كنت زيك احس بطعم الحياة	الممثل : ياريتنى كنت زيك احس بطعم الحياة
الممثل : " بأسى " يابختك	الممثل : " بأسى " يابختك

(يقفا صامتين أمام بعضهما البعض ثم بحركات راقصة يلتصق ظهرهما وينزلا على الأرض ويرتميا ميتين كوضع الولادة ، وتسלט عليها الأضواء ليكون ضوء واحد غير منقسمين)

● يدخل مغنى ويقف فى منتصف المسرح ويغنى ..

خرج ابن آدم م العدم قلت : ياه

رجع ابن آدم للعدم قلت : ياه

تراب بيحيا .. وحى بيصير تراب

الأصل هو الموت ولا الحياه

عجبنى

- إظلام -

ميدان العتبة

علاء قریش

مليون دولار مسرحية قصيرة

شخصيات المسرحية

د / محسن

هناء

ممدوح

الديكور

غرفة إستقبال بشقة الدكتور محسن وزوجته هناء
على يمين المسرح باب الشقة

هناء : " تجلس على كنبه الصالون فى واجهة
المسرح وتقوم بصناعة بوكليت توريكو ثم وهى
تنظر اليه وكأنها تتحدث الى محسن "
يارب يعجب محسن .. انا عارفه ان ذوقى بيعجبه
" تحتضن البوكليت " يا حبيبى يا محسن طول
عمر ك بتحب اى حاجة انا بعملها ربنا يخليك ليا "
فى حزن " اه لو ربنا رزقنا بحتة عيل كده يبقى
شبهك حكون أسعد واحده فى الدنيا بس انت

ميدان العتبة

علاء قریش

ياحبيبي اللى مش عايز بتقول لما احوالنا تتحسن
نبقى نخلف عيل واحد بس وبقالنا عشر سنين
متجوزين .. طب اهو خدت الدكتوراه واكيد فى
الشغل حيدوك علاوة زيادة ومش بعيد يرقوك
واكيد مرتبك حيزيد نشوف بقى حتوفى بوعدك
ونجيب العيل عيل واحد يسلىنى فى وحدتى ويبقى
قاعد قدامى كده على طول يعوضنى عن غيابك
طول النهار وياسلام لما يكون شبهك واقعد اكلمه
كده عنك على طول بدل مانا قاعده اكلم البروفل
(يرن جرس الباب لتقوم هناء مسرعة ناحية الباب
وهى تقوم بتنسوية شعرها وملابسها)

هناء : اهو جيه حبيبي دايم يا حبيبي مواعيدك
مضبوطه

(لتفتح الباب ليدخل محسن وخلفه هناء)

محسن : السلام عليكم

هناء : عليكم السلام يا حبيبي حمد لله على السلامة

ميدان العتبة
علاء قریش

محسن : " وهو يجلس على كنبه الصالون " ازيك
يااجمل واحلى هناء فى الدنيا

هناء : " وهى تحتضنه من الخلف " ازيك انت
يااجمل زوج فى الدنيا

محسن : " يمسك البوكليت " بردك ياهناء تعبتى
نفسك وعملتى البروفل

هناء : وانا لو متعبتش لجوزى حبيبى اتعب لمين
وبعدين انا يعنى عملت ايه اهو بتسلى
محسن : " يتأمله " بس بينى وبينك جيه فى وقته
دا انا حصلى فصل بايخ النهارده

هناء : " وهى تجلس على كرسى بجواره " خير
ياحبيبى

محسن : النهارده طبعا كان يوم القبض

هناء : ايوه ياسيدى والمرتب زاد

ميدان العتبة
علاء قریش

محسن : وزى مااتفقنا اول زياده فى المرتب اجيب
طقم جديد بقى او بدله بدل من اللى اشتكت من كتر
لبسى ليها ولو انى كنت عايز اول زياده تاخديها
انتى تجيبى بيها حاجة ليكى

هناء : يا حبيبى ربنا يخليك ليا انا يهمنى مظهرك
قدام الناس

محسن : ربنا مايحرمنيش منك ابدا .. المهم ياسيتى
نزلت على وسط البلد وخذتها لف على المحلات
انى الاقى حاجه تناسب الفلوس اللى معايا لحد
مارجلى ورمت من كتر اللف الاسعار نار قلت
بقى مابديهاش اتفرج بقى لاشرا ولا كمان فرجه
وقفت قدام افخم محل فى وسط البلد ييجى كده
عشرة ربع ساعة اتفرج لاقيت بيع طلعلى من
المحل إظهار كان مراقبنى من جوه قالى اتفضل
يا استاذ حتلاقى طلب حضرتك عندنا .. عندنا جوه
موديلات احسن من المعروض حسيت ياهناء انه
قبض عليا وانه لامفر منه فقلت مابدهاش قربت

ميدان العتبة
علاء قریش
٤٣

منه وانا كلى كسوف وقتله بصراحة انا عايز
بنطلون وقميص وجزمه كله كده على بعضه بميه
وخمسين جنيه

هناء : وجابلك

محسن : عارفه ياهناء نظرات الراجل ليا خلتنى
اجيلك قبل ميعادى بنص ساعة

هناء : " تنتظر الى ساعتها " اه صحيح يامحسن دا
انا اللى كنت فكراك جاى فى ميعادك

محسن : الراجل بصلى بصبه ياهناء كانى شتمته
انا مادريتش بنفسى الا بعد مالقيت نفسى قدام
البيت حسيت ان كل الناس بتبصلى وتضحك عليا

هناء : لا عاش ولا كان اللى يضحك على الدكتور
محسن " تضحك " وانت اتجننت يامحسن هى فى
حاجة اليومين دول بميه وخمسين أقولك احنا نحط

ميدان العتبة

علاء قریش

الزيادة دى بتاعة الشهر ده مع الشهر اللى جاى
وتجيب اللى انت عايزه

محسن : لا ياهناء ولا الزيادة دى ولا الزيادة اللى
جايه دا علشان اجيب طقم واحد عايز احوش
الزيادة لمدة سنتين طنشى

هناء : طب والواد

محسن : " متعجب " واد ايه

هناء : ابننا اللى قلت نخلفه بعد الزيادة

محسن : " ساخراً " نخلف ايه ياهناء بقلك علشان
نجيب طقم هدوم محتاجين زيادة على المرتب
سنتين يبقى الواد بقى محتاج كام سنة زيادة قال
مش قادر يقوم قال عقلوه
هناء : " فى عدم فهم " ايه
(جرس الباب يرن)

ميدان العتبة
علاء قریش
٤٥

هنا : " فى حالة إستغراب " ياترى مين اللى
جايلنا الساعاتى

محسن : هو فى حد من اهلك جاى

هنا : مانت عارف اننا من ساعة ماتجوزنا مفيش
حد من اهلى ولا اهلك جم من غير ميعاد

محسن : امال ايه

هنا : مش عارفه .. طب مانشوف مين
(محسن يتجه الى الباب ليفتح باب الشقة)

ممدوح : " يدخل وهو حامل شنطتين هدايا
كبيرتين " مساء الخير
(محسن يقف مشدوهاً لا يتحدث)

ممدوح : " وهو يدخل " أيه يامحسن مش حتقول
ادخل " لهنا " ايه ياهنا هو جوزك اتعلم البخل
ولا ايه

ميدان العتبة
علاء قریش

(هءاء ءنظر الیه مشءو هه مءءو ء یءلس علی
الكنبة ویضع الشنطتین علی الترا بیزه)

مءءو ء : فی ایه یاءماءه مالم یاءماءه ، انا طبعاً
مش مءءاء ءء یقولی اءفضل انا فی بیء اءویا "
ینظر الی هءاء " ایه یاءهءاء معقوله مش عارفه
مءءو ء طب مءسن معءور انه ماعرفنیش بس
انءی مءعرفنیش مش معقوله كءه از عل " لمءسن "
شفءك قءام مءل ملاءس وكنت بءكلم البیاء علی
فكره مءل الملاءس المءل ءه بءاعی والبیاء برءه
بءاعی " مسءءرجاً " قصءی شغال عءءی ءلئته
یمشی وراك وعرفت عنوانك " وهو یناول مءسن
شنطة الهءایا " عموماً یاسیءی انا ءبء لك اللى
انء كنت عایزه واستعلئته یاراءل هو فی ءاءه
بالبءن اللى انء قلت علیه الیومین ءول " یناول
هءاء هءئتها " وانء طبعاً یاءهءاء ماقءرش انساكی
وانا عارف زوكك من ايام الءامعه انء مائغیرئیش
كئیر زى مائء ءمئلہ
(مءسن وهءاء صامءنن ینظرا الیه فقط)

ممدوح : " يقف ويدور حول المسرح " فاكـر
يامحسن ايام الجامعة لما كنا بنتنافس على المركز
الاول " ينظر الى هـناء " ومين فينا يقدر يكسب
قلب هـناء كان حلم كل واحد فينا انه يتجوز هـناء
وانت بقى عرفت تخطف المركز الاول وسرقت
منى هـناء

محسن : عمرى ماكنت سارق وانت عارف ده
كويس وهـناء عمرها ماحبتك وده انت عارفه
كويس

ممدوح : كونك تطلع الاول اقدر اقول
ماسرقتهوش لكن هـناء لا انت سرقتها منى وانت
عارف ان هـناء كانت معجبه بيا انا " لهـناء " صح
ياهـناء

هـناء " : تنظر لمحسن فى ارتباك " انا جايـز كنت
معجبة فى الاول بيه انه شاب بسيط على قد حاله
قدر يتفوق وينافس على الاول فى الكليه وكان

ميدان العتبة
علاء قریش

بيعجبني فيه طموحه .. اه كنت بحاول أشجعه لكن
عمرى ماحبته

ممدوح : " بخبث " وكلامك الحلو ليا وانك
بتكويني مبسوطه .. وانت معايا ونفسك تشوفيني
الاول على الكلية وعميد الكلية كمان

هنا : " على نفس الارتباك فى نعمة تبرير " اه
كنت بقوله كده نوع من انواع التشجيع لكن والله
عمرى ماحبيته " فى حسم لممدوح " اه عمرى
ماحببتك ياممدوح انا طول عمرى ماليش غير
واحد هو محسن

ممدوح : " بخبث " ولحد دلوقتى " ينظر الى
الشقة " ولحد دلوقتى ياهناء هو حلمك فى العيشه
الى انتم عايشنها دى هو حلمك فى العيشه اللي
انتم عايشنها " يمسك البوكليت " ايه كنت
بتفصيليله بروفل علشان توفرى تمنه مساكين هى
دى اخرتها ياهناء شقة جبرتين وصالة وماهيه
مش قادرين تشتروا بيهم طقم هدم

ميدان العتبة
علاء قریش
٤٩

محسن : ولو ياممدوح انت عمرك ما قدرت
تتافسنى ولا فى التفوق فى الكلية ولا فى حب هناء
" يقف امامه " انت ضعيف وعمرك ما حتتغلب
عليا فى شئ حتى فلوسك دى اللى انت جاي
تتباهى بيها علينا واللى مانعرفش مصدرها ايه
واللى انا متأكد انها مش من طريق شريف لانك
عمرك ما عرفت الشرف وطول عمرك عندك
استعداد تببيع اى شئ علشان توصل لهدفك حتى
ولو كان شرفك فلوسك دى مش حتهزنا ولا تفقدنا
الثقة فى نفسنا وحنفضل نحب بعض وسعدا
بعيشتنا دى اللى انت بتعيرنا بيها .. ودلوقتى افاك
اطلع بره بيتنا اللى مش عجبك واللى مايشرفهوش
انك تدخله لان البيت ده مايدخلهوش غير الملايكة

مدوح : " يجلس " براحة على نفسك يامحسن "
لهناء " قولى لجوزك ياهناء يهدى شويه .. بصوا
بقى انا جاي اعمل معاكم صفقة انا معايا فلوس
وفلوس كتير متسألوش انا جبتها منيين عشر سنين
تخلينى ابقى ملياردير وانتم زى مانا شايف
محتاجين فلوس وفلوس كتير تغير حياتكم وسيبك

ميدان العتبة
علاء قریش

ياهناء من كلام الانشا والخطبة العصماء اللي اقلها
جوزك الدكتور كلام مايبأكلش عيش انا حديكم
مليون دولار بشيك مقبول الدفع " الوجوم وعدم
الفهم يكسو وجه محسن وهناء "

ممدوح : " بخبث وهو ينظر اليهم وفي تأكيد " اه
مليون دولار مش مليون جنيه وده طبعاً ليه مقابل
ومقابل بسيط وبسيط جداً هي ليله ليله واحده "
يقف امام محسن ويخرج دفتر الشيكات وينزع منه
شيك ويوقعه " ليله واحده حقضيها في الشقة دي
مع هناء وحضرتك حتاخذ الشيك ده وحتيجي تاني
يوم الصبح بعد ماتكون عديت على البنك وصرفته
حتيجي مش حتلاقيني وحاخفتي نهائي من حياتكم
(لحظات - ليقوم محسن بضرب ممدوح بالقلم ثم
يمسك به ويوجه له لكلمات لتقوم هناء صارخة
وتوجه لممدوح الضربات وممدوح لايتحرك)

هناء : يابن الكلب ياوسخ اطلع بره

محسن : عديم الشرف قدر .. اطلع بره ياكلب

ميدان العتبة

علاء قریش

ممدوح : " يضع الشيك على الطاولة " شيك
بمليون دولار سأتركه على الطاولة أمامكما لتفكرا
سأحضر غداً إذا وافقتما سأوقع على الشيك
ولتخرج يامحسن وتغلق الباب ورائك وتعود في
الصباح لن تجدنى وستجد زوجتك
(خرج وتركهما يجلسا متجاورين والصمت يلف
المكان لا يسمعا إلا أنفاسهما المتلاحقة .. فقط
عيناها مثبتة ناحية الشيك)

— هل تمت ؟ —



رقم الايداع

ميدان العتبة
علاء قريش
٥٣